



Makloke

Mudansa klimátika sai isu sentrál iha prosesu iha seitor dezenvolvimentu hotu-hotu dezenvolvimentu bele sai ameasa boot ba balansu ekologia. Bainhira dezenvolvimentu la fo prioridade ba ekologia hodi afeta ba biodiversidade nia moris no impaktu ba mudansa klima, bailoron naruk, udan la tun nia tempu ona, tasi sae, rai monu no seluk-seluk tan.

Naturalmente natureza lahusik ona sirkulasaun tempu tuir lala'ok natureza hanesan iha Timor Leste tempu udan no bailoron fahe ba etapa rua, tempu udan sei komesa husi fim de fulan novembru no remata iha fulan fim de maio no bailoron husi fulan junhu to novembru maibe prosesu normal ne'e komesa troka ona ho termu ne'ebé toman ona ho tilun mak mudansa klimatika.

Timor-Leste nu'udar nasaun ne'ebé restaura nia independensia iha 20 de Maiu 2002 hasoru isu ka problema boot ne'ebé mundu agora daudaun enfrenta. Hakarak ou lakoi Timor-Leste tenke hola parte iha asuntu ida ne'e. Mesmu Timor-Leste hanesan nasaun ki'ik ho luan 14.873 km² no total populasaun 1,066,582 (sensus 2010) ne'ebé iha fase dezenvolvimentu sei hasoru obstaklu boot tanba, tanba tenke kuidadu hodi hatur balansu ekologia ho dezenvolvimentu fisiku.

Pergunta sei mosu katak kuantidade emisaun hira mak Timor-Leste kontribui ba mudansa klimatika no oinsa ho nasaun vizinho sira seluk? Dalaruma Timor-Leste bele sai hanesan nasaun ne'ebé simu de'it impaktu husi mudansa klimatika kompara ho nasaun industrializasaun seluk iha mundu ne'ebé produs emisaun barak. Nune'e preokupasaun ida ne'e tenke hatur ho los no asuntu mudansa klimatika tanba la'os kausa internal maibé mos kausa eksternal nune'e tenke mai kontribuisaun nasaun hotu-hotu hodi hatun sira nia emisaun.

Saida mak mudansa klimatika?

Mudansa klimatika nu'udar kondisaun ida, iha ne'ebe mudansa husi klima ne'ebe la tuir nia tempu ona hanesan, udan komesa la tau tuir nia tempu ona, bailoron naruk no tasi sa'e ka ho definisaun Siensia katak, kompozisaun kimiku iha atmosfera ne'e mai husi emisaun hodi aumenta gas estufa liu-liu karbon dioksida, metana no asam nitrat.

Kausa Mudansa Klimátika no nia Efeitu ba moris loron-loron nian

Kausa ba mudansa klimatika fundamentalmente ita bele kategoria ba kausa ideolojika mos, hanoin sira ne'ebé determina sistema no asaun moris povu nasaun sira nian. Alem de, industrializasaun ne'ebé rapidu-la'o makaas no paradigma dezenvolvimentu modernizasaun ba kresimentu ekonomiku.

Estadus Unidus hateten katak Growth first, Clean later-kresimentu ekonomika uluk tiha lai mak hamos ikus, iha nivel supraestrutura global-nivel ideas nian, ne'ebé influensia kuaze iha nasaun hotu iha mundu.

Problema seriu ne'ebe agora ita mundu ne'e hasoru maka mai husi over konsumu, laos husi 80% povu kiak iha mundu ne'e 20% ne'ebe konsumu rekursu iha mundu ne'e ho katen.

Timor-Leste agora dadaun iha pos dezvoltamentu hanesan komesa iha planu dezvoltamentu industrializasaun koridor tasi mina iha tasi mane no Zona Ekonomia Espesial Merkadu iha Oekusi no dezvoltamentu seluk hanesan harii konstrusaun iha capital Dili hodi tesi mos ai lubuk ida.

Maioria populasaun Timor Leste 85% ho vida agrikultura ne'ebé halao sira nia vida moris ho to'os, natar, peska no veterinaria, nune'e dependensia ba klima ne'ebé normal hodi fo moris ba sira iha ameasa nia laran, tanba mudansa klimatika lori impaktu boot ba mundu nia ekosistema, mosu moras oin-oin, hamlaha, dezastre naturais hanesan rai halai, bai loron naruk, tasi no inundasaun. Situasaun ida ne'e afeta ba número ki'ak aumenta, dependensia ba natureza komesa ho forma ne'ebé ekspliativu ka pratika krime ambiental komesa mosu iha fatin-fatin.

Animál sira hamlaha tanba duut laiha ona, lori veterináriu sira tenke tesi ai hodi fó han animál sira, komesa utiliza adubu an organiku ba to'os ka natar no rai nia bokur komesa lakon ona, utilizaun transporte ne'ebé fó poluisaun ba mundu no eksploitaun ba mina hodi fasilita transporte sira bele la'o.

Tuir relatóriu Komunikaun Inisiál Nasionál kona ba Mudansa Klimátika ka INC impaktu husi mudansa klimatika iha Timor-Leste bainhira produsaun poténsia iha agrikultura nian tuun no iha poténsia diminuisaun todan iha konteúdu bee iha rai laran, partikularmente iha distritu parte norte hanesan Oecusse, Manatutu, Baucau no parte balun husi Covalima. Iha setór saúde nian, komu atmosfera kontinua manas, analiza INC nian indika katak risku ba malária no dengue aumenta tan, partikularmente iha parte orientál (ba malária) no iha parte klaran nasaun nian (ba dengue).

(Intergovernmental Panel on Climate Change) hato'o ona katak bainhira mundu la hatún nia emisaun gas estufa to'o 40-45% husi tinan 1990 iha tinan 2020 no 85-90% iha tinan 2050, mundu sei hasoru dezastre boot, no nasaun illa ki'ik sira barak mak sei lakon.

Política Timor Leste nian ba Adaptasaun Mudansa Klimátika

Timor Leste rasik iha Política ne'ebé funda ona hanesan iha ita nia konstituisaun .

RDTL artigu **6 alínea F** *proteje didi'ak meu ambiente no boli 61 no 139 hatuur katak oinsá ita tenke konsidera ita nia meu ambiente hanesan parte integrado husi ita ema moris nian nune'e prosesu dezvoltamentu tenke tau ás ekolojia hanesan xave ba harii nasaun ne'ebé sustentavel* no National Adaptation Programme of Action (NAPA) on Climate Change no Konvensaun ratifikativu ONU nian balun hanesan : ***the United Nations Framework Convention on Climate Change (UNFCCC) in October 2006, the Kyoto Protocol to the UNFCCC in October 2008, the Convention to Combat Desertification (UNCCD) in August 2003, and in January 2007 became a party to the Convention on Biological Diversity (UNCBD). The Vienna Convention for the Protection of the Ozone Layer and the Montreal Protocol for the Reduction of Substances that Deplete the Ozone Layer.***

Kometimentu hodi hatur politika hirak iha leten mak sai prekusasaun boot tanba, kontribuisaun ba adaptasaun mudansa klimatika ataka ho Timor-Leste ne'ebé tenke harii infrastrutura barak hanesan loke estrada foun, harii edifisu industrilizasaun ba mega projetu iha koridor tasi mane, Zona Espesial Ekonomia Sosial (ZEEMS), nsst.

Prioridade ba seitor produtivu seluk hanesan turizmu, agrikultura hasoru dezafiu boot no iha parte ida ne'e no ita hetene katak seitor turizmu no agrikultura hanesan rekursu ne'ebé rohan la'ek. Nune'e mitigasaun no adaptasaun politika industrializasaun sira tenke hatur ho seriadede no aplika leis sira ho rigor.

Saida mak ita bele kontribui ba Adaptasaun Mudansa Klimátika iha Timor-Leste

1. Tara Bandu

Aprosimasaun tara banu nudar pratika ne'ebé beila ala sira hatoman ona hodi hala'o iha sira nia vida moris, hanesan bandu ta ai, bandu sunu rai, bandu oho animal fuik. Pratika ida ne'ebé bele kontribui ba adaptasaun mudansa klimatika.

2. Kuda ai ne'ebé produtivu ho fo fila fali funsaun ai laran ka fó balansu ekolojia hodi, evita rai halai, no hasai rendimentu ekonomia komunidadade ne'ebé sustentavel.

3. Implementa prinsipiu minimiza, uja fila fali reciclajen no kuda fila fali ka 4R (Reduce, Re use , Re cycle, dan Re plant).

Aprosimasaun hirak ne'e sai nudar responsabilidade ema hotu-hotu nian katak mudansa klimatika la'os mai husi afeitu internal nasaun ida-idak nian hanesan mos Timor-Leste maibe, ema ida-idak iha responsabilidade hodi pratika hahalok ne'ebé la estraga ekolojia hodi kontribui ba adaptasaun mudansa klimatika.

Autór: Haburas Foundation

Publikasaun ne'e produzir ho apoiu husi União Europeia. Ho konteudu eksklusiva ba responsabilidade HABRURAS/HASATIL no mos labele, iha kasu ruma, konsidera nu'udar expresaun ba posisaun União Europeia"